

Date – 12/12/2024

Time - 18:30 -18:40Hrs

REGIONAL NEWS BULLETIN

HEADLINES (EVENING)

1. Larsap Dr Hari Babu Kambhampati an PMUY hnuaia eirawngbawlina gas connection dil, la hmu lo tan chingfel tura hma a lak thu leh hmalak pui zel a inhuam thu a sawi.
2. Chief Minister Pu Lalduhoman sorkarin handholding policy a kalpui mek chu duhsak zawngte pek mai mai an tum loh thu a sawi.
3. Lok Sabha MP Pu Richard Vanlalmangaihan Parliament thlasik thutkhawmah Manipur buaina chingfel turin Sorkar laipui a phut thu a sawi.
4. Vawiin khan Union Cabinet chuan ram chhunga tum khata inthlan buatsaih, 'One Nation, One Election' hman turin an pawm.

<><><>

GOVERNOR

Larsap Dr Hari Babu Kambhampati chuan Pradhan Mantri Ujjwala Yojana (PMUY) hnuaia eirawngbawlina gas connection dil, la hmu lo tan chingfel tura hma a lak thu leh hmalak pui zel a inhuam thu a sawi.

Vawiina Mizoram Consumer Union Annual General Meeting vawi 27-na, Synod Conference Centre, Aizawla a telpuinaah he thu hi Larsap chuan a sawi a. Mizoram Larsap hna a chelh tirh phatah PMUY hnuaia a thlawna eirawngbawlina gas dil theih chu Mizoramah a dil tam tak pek an ni lo tih a hriat thu a sawi a. Gas company hotute pawh heng mite tana gas connection pechhuak vat tura a ngen thu a sawi a. Hetihlai hian PMUY hnuaia diltute tam takin anmahni nihna tihchianna tur KYC lak lamah harsatna a awm tih sawiin Mizoramah mi tam takin an phone number thlak an hrata a hriat thu leh hei hian an phone number KYC-a dah turin an Aadhar-a phone number awm nen a inmil loh thin thu leh, chu chuan a thlawna eirawngbawlina gas an dawna turah harsatna a siam thin thu a sawi a ni.

Hei vang hian helam khawihtu officer te chu diltute biometric verification ti mai tura a ngen thu Larsap chuan sawiin dilna tam tak a buaipui sak te chu pek an nih thu a sawi a. Helama harsatna a la awm chuan Mizoram Consumer Union hruaitute chu a hnena kal tur leh helam khawihtu officer te pawh koin a hoa an sawi tlan zel theih tur thu a sawi a ni.

BYTE OF GOVERNOR....

Mizoram Consumer Union hian tun dinhmunah Aizawlah Hqrs. a neih bakah District tinah Sub-Hqrs. a nei a. Branch 180 leh Club 60 a nei mek a ni.

<><><>

CM

Chief Minister Pu Lalduhoma chuan sorkarin handholding policy a kalpui mek chu duhsak zawngte pek mai mai an tum loh thu leh, state ei leh bar leh mipuite rilru puthmang siamthatna tur a kalkawp dawn thu a sawi.

Vawiina Serchhipa New Serchhip Kum 50 tlin lawmna a hmanpuinaah Chief Minister chuan he thu hi a sawi a. Chief Minister chuan, Chief Minister chuan Serchhip bial chhung tana hmasawna hnathawh tur chhawp chhuah hrang hrang a tarlan zingah New Serchhip Kikawn atanga Serchhip Hmar Veng, Sports Complex panna kawng pawh tur kawng chu cheng nuai 1611.11 senna tur ruahman a ni tih a sawi a. Sawrkar laipuiin an approve veleth thawh tur a ni tih a sawi a, Zawlpui panna link road siamthatna turin cheng nuai 1000 ruahman a nih thu te, Paragliding hmun panna tur kawng siamna atan cheng nuai 358 dah a nih thu te, Mat luia Irrigation Phase II kalpui nan cheng nuai 371 ruahman a nih thu te, Vantawngkhawthla enna atanga Vantawngkhawthla pawhtu tur ropeway siamna atan cheng vaibelchhe 32 ruahman a nih thu te, New Serchhipa Helipad chu Heliport-a siam tum a nih thu te, Khawtetlangah Circuit House dah tum a nih thute a sawi a ni.

<><><>

LUNGLEI CMAS PREPARATION

Mizo kristiante hunpui hlut ber, Krismas chu kar khat vel lek in a dang tawh a, Lungleiah chuan Krismas boruakin mipui chiah tan bawk mahse kum dang ang em em in khawlaiah leh sumdawna hmuna mipui an la tam rih lo tih kan corr chuan a sawi.

Lungleiah hian Bazar na pui ber chu sakthat mek anih avangin bazar area leh a chhehvelah thawmhnaw zawrhna siam a ni lova, kawngkam leh mimal dawr kawtah te thawmhnaw zawrh a ni.

Khawlai chei a awm vak lova, Venglai khawtlang erawhin Saikuti Hall bul a, Tennis Court hmunhlui chu eng chi hrang hrang nen cheiin mipuiin an hlut hle tih kan corr chuan a sawi a, a report lo ngaithla ang.

<><><>

MP

Lok Sabha MP Pu Richard Vanlalmangaiha chuan Parliament thlasik thutkhawmah thu sawiin Manipur buaina chungchangah Sorkar laipui chu remna palai ah tanga hnam pahnihte dawhkan khat kilpuia an harsatna chinfel dan tur sawipui tura a phut thu a sawi.

Lok Sabha MP Pu Richard Vanlalmangaiha chuan sorkar laipuiin Myanmar, Bangladesh leh Manipur buaina avanga Mizorama ral tlante tan chhawmdawlina sum leh pai thahnem tak Mizoram Sorkar hnena a pek avangin lawmthu a sawi a. Hetihlai hian Manipur buainain hun a awh rei ta hle tih sawiin mi 200 chuang zetin nunna hlu tak an chan tawh thu leh, mi sing nga chuangin in leh lo an chan tawh bakah Kristiante Biak In 300 chuang zet hal a ni tawh tih a sawi a. Sorkar laipui tan mahni ram chhung ngeia buaina thleng chu a chinfel dan ngaihtuah a hun ta hle a ni a ti.

Pu Richard Vanlalmangaiha chuan tun dinhmuna sorkar laipuiin Paramilitary Force tam tak pawh tir lut mahse heng community pahnihte

inkara inremna a awm chuan si loh chuan an harsatna chu sut kian tak tak a nih a rinawm chuang loh a ti a. Hei vang hian sorkar laipuiin community pahnihte dawhkan pakhat kilpuia an harsatna sutkian dan tur sawipuia remna palaia tang turin a phut tih a sawi a ni.

<><><>

CADC

Chakma Autonomous District Council sawm pakhatna chu nimin CADC thlasik thutkhawmah namthluka awmin, MDC 8 in vawiin khan BJP an zawm.

Nikum May ni 25 a CEM a tana lakluh Pu Rasik Mohan Chakma chu rintawk lohna Motion hmanga paihtlak a ni a, vawiin khan CADC a MDC pariat te chu BJP Office Kamalanagar, Chawngte ah lawmluh an ni a, lawmluh te hi Pu Lakkhan Chakma, Pu Sundor Muni Chakma, Pu Molin Kumar Chakma, Pu Ananta Bikash Chakma, Pu Montu Chakma, Pu Kalasoga Chakma, Pu Supon Chakma leh Pu Sanjib Chakma te an ni a, Chakma District President, Pu Durjya Dhan Chakma Delhi a zin hlan a nih a vangin District Vice President, Pu Doyal Chandra Dewan chuan MDC lawmluhna hun a hmang a ni.

BJP party lamah MDC 8-te lakluh a nih tak avangin tunah hian member 20 awmna CADC-ah hian BJP hian member 9 a nei ta a, ZPM in member 10 neiin, MNF in member 1 an nei a, sorkarna siam thei an la awm lo a ni.

<><><>

MZP

MZP chuan tunhnaia MPSC hnuaia hna lak dan rinhlelhawm a awm ni a sawiin chhui chianga hma la turin Mizoram sorkar an phut.

Hemi chungchanga MZP thuchhuah tarlan danin MPSC-in Health & Family Welfare Department a thawk tur, Entomologist post khat ruak hnawhkhat turah exam hmachhawn turin mi 22 an tling a. Exam beitate atangin mi 5 te chu an Document endik tura thehlut turin hriattir an ni a. Thla 6 ral hnua mi 3-te chu personal interview nei tura hriattir an ni a. Interview nei tura inbuatsaihna a kal mek laiin, Interview hun sawn thut a ni a. Hna diltu zawng zawngte document ennawn turin Screening Board member pawh ruat thar a ni a. Interview tura a tira koh tel loh mi pakhat Pu Lalfakzuala Pautu chu koh tel nawlh niin, final result-ah pawh Pu Lalfakzuala Pautu chu lak a ni ta tih an tarlang a ni.

MZP chuan he hna lak dan hi uluk taka zir chian a, chhui a nih hnua duhsak zawngte thun tura ruahman a ni tih hai rual a ni lo an ti a. MZP chuan thalai hna zawng mekte ti hnual thei leh MPSC zahawmna ti chhe thei thil a nih avangin a ngai thutak hle tih sawiin chung lam atangin thil tithei inrawlh an awm ngeia an hriat tlat avangin, chhui chian a phut tih an sawi a. MZP chuan MPSC-in Entomologist hna a lak dan leh Veterinary Asst. Surgeon hna a lak dan rinhlelhawm an ti tih sawiin, chu chhui chianga, a tul anga hma la turin Mizoram Sawrkar a ngen a ni.

<><><>

AMC

Aizawl Municipal Corporation (AMC) chuan tunhnaia an hna lak, post pali chu an hnukkir leh a,

Vawiina AMC Municipal Commissioner in thu a chhuahah hian Mayor pawmpuiin tunhnaia an hna lak pali, Public Relations Officer post 1, Project Assistant post 2 leh Assistant Accounts Officer post 1 te chu hnukkir a ni tih tarlan a ni.

MZP General Headquarters Extended OB Meeting chuan tun hnaia AMC hnuaia hna post pali lakah hian thil felhlel, mimal induhsakna uchuak a awm nia an hriat thu leh a rang thei ang bera sut turin AMC hotute nimin khan thuchhuah siamin an ngen a. AMC Executive Council Meeting chuan kumin September ni 11 khan hna hrang hrang, Fixed Pay leh Contract Basis a lak nise tih an rel tih sawiin MZP chuan an thurel ang hian hna hrang hrangte hi advertisement tel lovin, an mi duhsak zawng an la an ti a. MZP chuan thalai lehkha thiam hna zawng mek tam tak awm karah, duhsak zawngte hnaa thun thawm hriat tur awm fo chu pawl an tiin an dodal tih an lo tarlang tawh a ni.

MZP chuan March ni 12 khan AMC hnuaia Geologist-3 leh Urban Animal Husbandry & Veterinary Officer, Junior Engineer leh Asst Account Officer pakhat theuh lak danah dan kalha thiltih a awm ngeia an hriat avangin MZP ngenna angin AMC Executive Council Meeting march ni 15 a thukhawm chuan, AMC hnuaia hnalak hrang hrangte hi a sut a. March, ni 18 khan sutna lehkha hi tihchhuah niin hna sut tawhte hi tun hnaiah tharthawh leh in, a mi ngai thenkhatte thun nawn leh an ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Natuk zing dar 7 leh a chanve ah Chanchinthar hi puan leh a ni ang.

<><><>

UNION CABINET APPROVES ONE NATION ONE ELECTION

Vawiin khan Union Cabinet chuan ram chhunga tum khata inthlan buatsaih 'One Nation, One Election' hman chu an pawm a.

Hemi bill hi tuna Parliament thlasik thutkhawm mekah hian an pulut dawn niin sawi a ni.

Kumin March thla khan President hlui Ram Nath Kovind-a kaihhruai High Level Committee chuan 'One Nation One Election hi a rawn rawtchhuak a. Hei hi tihpuitlin a nih chuan Lok Sabha leh State Assembly chu a ruala inthlan a ni thin tawh dawn a ni.

Akashvani News, Aizawlin Dr Lalengkima, Assistant Professor, Department of Political Science, ICFAI University, Mizoram a kawmnaah One Nation One Election thatna hetiang hian a sawi:

<><><>

